

江北廳志

卷柒
卷捌

14297793

(4)

江北廳志

卷柒

藝文

詩物 雜錄文
傳記

卷捌

藝文

詩 啓 記

江苏工业学院图书馆
藏 书 章



江北廳志

藝文志

同知潤田福珠朗阿纂修

訓導蔚堂宋

煊編輯

文所以載道也故曰道之顯者謂之文若尋常月露風雲之詞無關風化不足以感發人心謂之才人之詞可耳其於振衰式靡勵俗維風之意蓋有當哉古之人經世宰物本道德爲文章其見諸詞華者無在不有補於人心風俗茲編所錄亦祇以事關牘屬有關風化及爲巴志所採入者登其一二亦未暇以尺寸相繩故與其多收不如少取也

誥勅

明

仁宗賜少師吏部尙書蹇義勅

制曰曩朕監國之時卿以先朝舊臣擢兼詹事日侍左右時肇建兩京政務方殷隨事籌畫適中惟難卿以善翊君以義徇國勞心焦思不恤身家載歷艱虞未有咨嗟之意及朕嗣

承大統贊襄治理用濟斯民喻朕於道不懈益恭二十餘年夷險一節朕篤不忘茲以已意創製寔忠貞印一枚賜卿用藏於家傳之後世俾爾子孫知前人顯榮於國者良不易致宜加保守朕之子孫亦知卿弼予於艱體朕愛卿之心以保爾子孫庶幾上下相安與國咸休書曰惟后非賢不乂惟賢非后不食自古君臣相遇難矣哉往績維茂永終是圖故勅

封王鳳鳴爲徵仕郎翰林院檢討勅

泰昌元年

制曰朕聞大儒之道恬以養身而智以裕後儉以取物而侈以練懷恬而智故其穀式似儉而侈故其羽可儀有美君子則亟下璽書褒之爾生員王鳳鳴乃翰林院檢討應熊之父研削宗下章縫領袖志在用世困於逢年長孺欣託夫箕裘教勤趨鯉嗣宗欲澆其磊塊興適持螯環堵蕭然勿問蠶蛸之掛樵蘇不爨時尋脈望之塵介性似元亮畏榮謝踪公府曠韻類漢陰履坦自息鞿鞅惟爾家珍爲予國寶茲封爾爲徵仕郎翰林院檢討佩龍綽以炳文賁鳩節而綏履

翰林院檢討王應熊授徵仕郎勅

制曰治堇金齊而後成鍾染羽漬而後入朕以喻學矣士出入承明將窮事變晰顯微非學何以知不足徒爲詞賦君子昔人不曰著作者前烈之餘乎爾翰林院檢討王應熊德宇邃沉才鑒清遠擢自庶吉列在清班而爾四部咀英三餘惜咎蒐奧渺於油素公筆削於槧鉛書舉芸臺元要襄不朽之業拔九棘院桃李成無言之蹊聲實齊蜚重遠可到茲以覃恩授爾階徵仕郎錫之勅命朕惟名碩之起詞曹若求天馬大宛之野多厥種焉而未有不由於學也惟學可以取精於古人惟問可以受益於今人學喻聚沙問喻攻木意遠哉爾尙旣厥心朕且大用汝

贈王鳳鳴爲中憲大夫詹事府少詹事誥

天啓六年

制曰細旃畫接朝資論道之英細帙庭開家有傳經之素故錫祉於教忠益篤而升華則詒穀用彰眷言矢志於講帷宜有崇褒於禰廟爾封徵仕郎翰林院檢討王鳳鳴乃日講官詹事府少詹事兼翰林院侍讀學士王應熊之父元囑廣研方聞出右淵夷而襟帶不設

弘亮而城府洞開博極羣書涵蚌珠於學海誦諸曹耦韞抵鵲於文山如此才不逢亦有
司之過得全於酒處約而雅尙彌堅獲佑於天履道而考祥終吉志抗高冥之表情耽老
典之區禽魚自來親人堂構欣其有託色絲補袞式徵弓冶之遺五味和羹坐待釜鍾之
薦茲以覃恩加贈爾爲中憲大夫詹事府少詹事兼翰林院侍讀學士如子官於戲風木
生悲聲香如在羽人山上鳳彩歲黹巴子國中鶴情瀟灑尙培嘉祉於封槐益衍休光於
奕葉

日講官詹事府少詹事兼翰林院侍讀學士王應熊授中憲大夫誥

天啓六年

制曰朕思重道崇儒期於廣益稽古正學所以日新惟論思啓沃之臣總承明著作之任得
賢人而居旃廈若礪於金循彝典以資袞章惟言如綍爾日講官詹事府少詹事兼翰林
院侍讀學士王應熊雅蘊宏才亮操端軌蚤疏庸於玉署旋人侍乎金華而爾靖共彌虔
束修無斃英詞足鼓羣動品藻不失人倫值實錄之浩繁俾綰史曹而汗竹當典學之攷
攷能抽緒論於橫經志業日益光明朝夕在朕左右媚茲辰告非堯舜不陳據乃寅兢惟

夙夜匪解頃因邊遽益獻廟謨綽有霖雨舟楫之資哀然凝承輔弼之望茲者祥開震序
慶首官僚乃以覃恩授爾階中憲大夫錫之誥命於戲忠結一人之知道濟天下之溺何
以基宥密之命何以收救寧之功學有緝熙古訓益光於說命言可底績時艱恆切於疇
咨不徒侈慶歷之緋衣行且資貞觀之金鏡時謂爾庸乃副朕簡欽哉

禮部尚書兼東閣大學士王應熊充經筵講官勅

崇禎七年

制曰朕惟帝王勤思三五期至治之有成先必典學就將懋緝熙於罔間朕不承大歷寅念
前修稽古準今夙宵靡敦講筵肇舉七載於茲特命太傅成國公朱純臣知經筵事爾同
少傅兼太子太傅吏部尚書建極殿大學士溫體仁吳宗達禮部尚書兼東閣大學士錢
士升何吾騁同知經筵事太子少保禮部尚書兼翰林院學士李康先等充經筵講官於
戲譌幄橫經豈止修清朝之故事金華納誨實願聞制治之良規從來理欲危微幾易淆
於爭勝與夫貞邪消長辨容混於雜投以至民生國計之安危吏治邊防之得失折衷寡
要雖資策畫於當幾鏡覈源流每藉權輿於古昔尚其交秉一德備殫忠謨抉前事爲後

事之師啓乃心作予心之牖使朕志皎如白日卽治理燦在目前庶收作嘯之功不負爲霖之託欽哉故諭

皇清

贈段君仲振威將軍江南水陸提督勅

道光十四年

制曰宣暢國威統三軍而奏績采甄世德遡四世以推恩積慶有源流光自遠爾段君仲迺提督江南全省等處地方軍務提調水陸節制各鎮段琨之曾祖父淳心抱質善氣儲祥丕建乃家允肇弓裘於奕葉克昌厥後誕膺節鉞於高門爰賁徽章俾揚令問茲以覃恩贈爾爲振威將軍提督江南全省等處地方軍務提督水陸節制各鎮錫之誥命於戲簪纓赫奕式隆一品之殊榮綸誥輝煌用慰九原之夙志祇承寵命永播休聲

贈段祥雲爲振威將軍江南水陸提督勅

制曰嘉勞臣之偉伐遠溯家風策專閭之宏勳上推祖德舊章斯在新渥攸加爾段祥雲迺提督江南全省等處地方軍務提調水陸節制各鎮段琨之祖父善可開先教能貽穀集

軒車於里閭早知世澤之長擁節鉞於方舟聿見孫謀之裕爰頒寵爵俾荷崇褒茲以覃恩贈爾爲振威將軍提督江南全省等處地方軍務提調水陸節制各鎮錫之誥命於戲錫五色之徽章丕光令緒沛九重之濺澤益煥膚功休命其承淳風追表

贈段萬選爲振威將軍江南水陸提督勅

制曰國爵攸崇樹鷹揚之偉烈家聲光大表蛾術之良模特布新綸用彰舊德爾段萬選迺提督江南全省等處地方軍務提調水陸節制各鎮段現之父清門代啓素履恭修教子義方早授豹韜之略傳家忠孝果符鵲印之祥慶典式逢崇階宜陟茲以覃恩贈爾爲振威將軍提督江南全省等處地方軍務提調水陸節制各鎮錫之誥命於戲顯揚克遂休茲天室徽章作述交輝展也人倫盛事令名無數世澤長垂

封江南水陸提督段現爲振威將軍誥

制曰提封千里資闡外之宏猷統御三軍樹師中之偉伐膚功克奏寵命宜申爾提督江南全省等處地方軍務提調水陸節制各鎮段現知既深沉才兼恢傑夙時緩帶久宣閱閱

之勞此日登壇遂受節旄之寄整威容於軍壘令肅凝霜占喜氣於戎行恩均挾纊逢斯
慶典被以徽章茲以覃恩授爾爲振威將軍錫之誥命於戲賁寵酬庸已推恩於鳳誥抒
忠報國尙有意於麟圖勿替乃勲祇服朕命

贈袁洙爲修職郎直隸資州資陽縣教諭勅

制曰任使需才稱職志在官之美馳驅奏效報功膺錫類之仁爾副榜袁洙乃四川直隸資
州資陽縣教諭袁文明之父雅尙素風長迎善氣弓冶克勤於庭訓箕裘丕裕夫家聲茲
以覃恩賜贈爾爲修職郎四川直隸資州資陽縣教諭錫之勅命於戲肇顯揚之盛事國
典非私酬燕翼之深情臣心彌勵

諭祭文

明

諭祭吏部尙書蹇義父源斌文

永樂七年

皇帝遣行人雷誠諭祭尙書蹇義父源斌之靈曰惟爾性質敦厚器宇溫淳篤志好善儀式鄉閭用生賢子輔弼予治敬恭夙夜益慎益勤推恩錫爵榮及爾身方期爾優游暮景樂此太平胡乃一旦奄然遐逝雖然生死者人事之常而爾生有寵襃沒有令譽夫復何恨茲特遣人諭祭爾其不昧尙克享之

仁宗爲太子時祭封尙書蹇源斌文

永樂八年

皇太子遣鴻臚寺右寺丞楊善致祭於故封資政大夫吏部尙書蹇源斌之靈曰卿以忠厚淳實之質和惠寬碩之德端直廉靜之行聞於時表於人有素矣余有賢輔孜孜助以善道久於一心余朝夕所資者惟卿之子推厥所本意念良深方期卿長享祿養而訃音遽至不勝悼嘆然官封六卿年及九袞榮名盛福而子孫世昌享祀綿遠卿復何恨哉茲特

遣祭以著予追念老臣之意惟靈享之

諭祭翰林院侍讀學士江朝宗文

七年

皇帝遣四川布政使司左布政諭祭於翰林院侍讀學士江朝宗曰爾以辨博之學敏達之才擢秀科甲蜚英詞苑史局著編摩之績經筵多啓沃之言暨晉秩於宮僚遂超登於翰佐屢持文柄節別惟精載與薦章擢用伊邇乃由橫累暫投散於外司旋復原銜許歸休於故里方膺壽祉胡遽考終訃音來聞良深悼惜特復爾祿以酬往芳諭祭爾靈用慰冥漠九原不昧尙克歆承


皇清

諭祭振威將軍謚勤壯直隸提督唐倬文

道光二十年

畿輔風清講武協師中之吉將臣星掩酬庸備身後之榮展偉略於龍韜瓊戈式煥宣湛恩於鳳綵芳俎宜陳爾原任直隸提督唐倬文性本知方才堪致果始執殳於國外每拔軔於行間豐畀帑銀重加品秩隴西進勦宣威而蜀徼胥平湖北從征奏凱而楚氛並息爰

作百夫之長旋膺專守之符吉羽遞更功牌懋賞殲滑城之遺孽伏地雷轟俘回部之渠魁新正露布優加甄叙洊陟升階用副元戎進躋方鎮荷奇軫之駢資邀勇號以驤騰百戰書勲宣力重干城之寄九重召對建牙隆專閫之權正倚毗之方殷何淪徂之忽告悉寬舊胥良深軫懷於戲輦鼓興思青史著疆場之績几筵用薦紫霓賁泉壤之輝靈其祇承歆茲芳苾



傳

明

馮縉雲先生傳

王應熊

非熊集
縉人

馮時行字當可別號縉雲重慶在宋崇寧爲恭州公恭州之南樂磧人少讀書巴縣之縉雲山寺故號縉雲嘉熙間狀元及第宰通義之丹稜有惠政異績以奉禮郎赴行在所時秦檜主和議忤之者立見貶逐公召對力言和議不可信至引漢高帝分羹事爲喻帝曰朕不忍聞顰蹙而起檜乃謫時行知萬州部使者至承風旨附會抵罪由是居里社十餘年權奸死起守蓬黎今蓬溪天彭而以提點成都刑獄終焉彝堅志載公守萬州日州有舞陽侯廟公以樊噲從高祖入蜀而萬州落南非噲所至是必夷鬼假託以取血食卽日撤其祠未幾出視事見偉丈夫被甲持戟坐於公庭馮叱之掀髯而怒曰吾乃漢舞陽侯廟食千歲君見毀撤吾無所歸馮力詆其生平所爲不少憚神奄奄而滅朝奉郎推發遺雅州軍事沿邊都巡檢使蹇駒撰古城馮侯廟碑云提點成都府刑獄功事馮侯隆興元

年死其官侯有功業於時死四年名山進士衆大中合邦人之思築宮於縣之古城以俎豆侯又三年駒來守雅州考侯事之終始刻之石先是經界之禍此邦實烈方經界之令甫頒民恐懼徇朝廷之法不敢輕售其姦法既行久且翫姦民始生心爭爲僥倖之索取前日久令紛更之弊始錯出跬步之田而受倍蓰之稅連阡陌者以巧倖入輕租貧者破產業瘠溝中枕藉幾蹈湯火之酷將且十年而侯持節而來問民疾苦首得此蹙然寢食不遑卽閉閣書奏報天子乞仍其故既畫可行民懼迎曰吾今更生矣及侯死民取水哭曰我有屋屋侯焉我使我獲弛然安居其下我有田疇以耕以飽皆侯之賜雖一飯必祝大中斥七十萬錢縛屋塑侯像民歲時歌舞其水旱癘疫必以禱侯亦能爲民禍福以恐動其民而食其土自侯爲部使者經畫邊事尤縝密此邦著之令甲世守界侯所在政卓異多去思民必祠之詩曰潔樽疊分酒冽清籩豆靜嘉兮肥腍其牲坎坎擊鼓兮式和且平攜持父子兮進侯庭維廟孔嚴兮有覺其盈寢簟孔安兮維侯是寧維侯相民兮式臨爾誠雨我公田兮淡淡其盈欲暘而暘兮犂犢肆耕厲鬼驅左兮風不暴盲維侯是安兮

侯無遽往公明果敢斷足當大事居里社時授徒講道安貧淡如也文尤高古人不致呼其名第目爲縉雲先生云

按先生經學皆有論著有縉雲集數十卷今大全中所引縉雲馮氏者是也

南京戶部侍郎倪岳同傳

劉道開

公諱斯蕙字爾澹別號岳同重慶衛軍籍家世業儒其先領鄉薦者二人仕皆不顯公幼而嗜學潛心帖括屬有所思至忘寢食或行市中且行且誦呼之亦不應人以書癡目之與同邑鄒公庭彥齊名學者稱爲鄒倪年二十五同鄒公聯捷登萬曆壬辰榜進士鄒入詞林而公宰楚之蒲圻縣其宰蒲也發奸摘伏敏速若神訟者有倪不解擔之謠謂不須解擔而官事已結也秩滿行取得吏部主事歷文選郎中正攝其掌六選前此未有也俄陞太常寺少卿避嫌歸養出京之日橐中僅四百金而已時公年才三十六而太公亦初滿六十里人榮之色養餘閒始博覽載籍旁探內典學爲詩文詩宗盛唐及昭代七子文法蘇長公而得其雄邁之氣下筆千言一韻數首伸腕立就然熟路不暇詳編錦不求備